

201.

1  
DEO OPTIMO MAX.  
UNI ET TRINO,

VIRGINI DEI-PARÆ, ET S. LUCÆ,  
Orthodoxorum Medicorum Patrono.

QUÆSTIO MEDICA,

*QUOD LIBETARIIS DISPUTATIONIBUS  
manè discutienda in Scholis Medicorum, die Jovis secundâ  
mensis Januarii, anno Domini M.DCC.XLIV.*

M. JOANNE-DAMIANO CHEVALIER,  
Regis Consiliario Medico ordinario in Insulâ Sancti  
Dominici, Doctore Medico, Præsidente.

*An Pests curatio Præferim ex symptomatis?*

I.

**I**N curandâ Peste, hanc sequere quam natura monstrat medendi viam, non quam tibi fingis systematis artifex. Syltema plerumque delirantis animi somnium, non vera naturæ indagatio. Cautus sit Medicus in scrutandis causarum arcanis, quæ natura celari voluit. Infidas dum sectatur umbras, falsâ veritatis imagine captus, captabit pro Junone nubem. Quid inde? ut meditantem malus abstulit error, sic medentem pejor deludit. Œconomiâ animali fulcitur medendi methodus. Hæc non à devîis, dubiis, falsive rationibus, sed aut à naturâ cædentis, aut à nocendi modo indicationes mutuatur. Essentiæ rei quæ lædit cognitio, ut ad curationem minimè necessaria, sic ingenii vires pluribus in morbis longè superat & vincit. Quis Tarantismi, Rabiei, luis veneræ, variolarum, imò februm intermittentium naturam scientiâ affectus est? Hi tamen morbi satis feliciter curantur, Tarantismus choreâ; rabies balneo marino vel quibusdam specificis; mercurio lues veneræ; febres intermittentes cortice peruviano. Cura variolarum opus non raro naturæ: hæc tamen sæpius auxiliatrices manus postulat quæ conatus suos adjuvent, non antevertant; crîsim expectent, non promoveant maturius, aut futuram non sufflamment. Pests (ex horum censu morbus) nequidem ipsa curationem renuit, si desumantur indicationes ex iis quæ venenatæ luis nocendi modum detegunt.

II.

**P**Estis quo vel solo nomine horret animus, mortaliaque contremiscunt pectora. omnium morborum truculentissimus, acutissimus, maximè contagiosus, febre, bubone, anthrace, exanthematis id genus horrendis stipatur. Ejus quæ sit causa. Natura, latuit usque in homine generari virus pestilens non modo ex humorum putredine, sed ex solo mali terrore, quidam affirmant, plures negant. Plurimi à putrescente veneno subtili per aëra vagante pestiferæ luis causam repetunt. At vandenam aëri lethiferum inquinamentum? Lis sub Judice. Alii hanc labem à Deo vindice immitti, alii à malignis siderum influxibus, alii à tempestatum certis constitutionibus, alii denique à tetrîs putridisque terræ, aquarum, cadaverum exhalationibus produci asserunt. Horum quælibet opinio nonnullâ veritatis specie ornatur; nulla certis & inconcussis stabilitur argumentis. A Deo creari pestiferam luem ex aliarum opinionum refutatione potius inducitur, quàm genuinis & propriis probatur rationibus. Malignos esse siderum influxus suspicari nimix credulitatis est. Ut aëris fervores maximos, ventos australes, sive siccos, sive humidos, nullæ pestes exceperunt; sic absque aëris inclementiâ Pestem insecutam. Imo mensibus Decembri, Januario, Febuario grassatam, & æstivis caloribus solutam fuisse notum est. Ex.

A

halationes post terræ motum ex ipsius sinu erumpentes venenatæ, non pestiferæ. Ambientem tantummodò aërem vitiant. Astantes suffocantur; sed non pestilentibus symptomatis cruciatis intereunt: nemini contactu, halitu morbosum virus communicant. Aquarum putridis exhalationibus imbutum aërem pestiferam vim induere posse quis æstimaverit? Plurimis in locis quæ peste rarius infestantur, sæpius aquæ corruptæ fetorem expirant intolerabilem. Nilus quot annis longè latèque diffusus terram obducit limo, piscibus, crocodilis, aliisque monstris refero, quæ aquis destitura computrescunt. Non inde tamen emergit pestifera lues Ægypto noxia. Omnibus ferè mensibus contagio forinsecus advehitur. Mundationis tempore, calidissima, austruenda, inæquali tempestate omnino desinit. Verùm si pestis in Ægypto ex effusione Nili, in Syriâ & Barbariâ undenam ortum ducit? A solis ardore? Cur illa Æthiopis ora quæ *Niger* fluvium accolit peste immunis est? Quid si Boreales plagæ non minùs peste infestantur quàm sole nimio ferventes? Illarum mercatorum, inquirunt, è regionibus torridis merces adferunt inquinatas, ipsi sæpius infecti redeunt. Commentum è variis, ne dicam omnibus orbis partibus in Sinarum regnum confluent omnis generis negotiatores, qui sit ut nunquam contagium forinsecus accedat, sicut è proprio regi òni emergit nunquam? Cadaverum exhalationes magnam habere vim ad pestem generandam, omnium ferè est essatum. At non semel post magnas strages cadaverum inhumatorum putrefactio nullas pestes induxit. Non ergo magis nota pestis origo quàm ipsius natura. Quid igitur in tantâ rerum caligine statuendum? Suâ quisque hypotefi delectetur; nil moreris; veneni noveris effectus, hos indicant symptomata.

## I I I.

**S**YMP TOMATI cuiquam aut pluribus simul ex veneno pestilenti nascentibus Occurrere vel mederi satagis? Indicantur ea quæ non minus morbo adversantur quàm symptomatis. Ipsi morbo decernis curationem? Quam tandem? Missionem sanguinis? Hanc quidem profuisse multorum observationibus constat, verùm & nocuisse innumeri testantur. Cave igitur hujus utilitatem æstimes cujusquam auctoritate & exemplis. Inspice non quis fecerit, sed cur & quo exitu. In Peste sanguinem Medici detraxerunt, & non miserunt magni nominis. De addhibendis fugiendis purgantibus, cum veteribus veteres, cum recentioribus recentiores decertant armis æqualibus; hinc discito venæ sectionis & purgationis usum salutarem aut infausum, non ex ipsâ morbi naturâ, sed ex veneni effectibus judicandum ad alexitaria confugas? Quenam? Non sunt ejusdem virtutis. Alia absorbentium, alia sudoriferorum, alia anodynorum, alia refrigerantium vice funguntur. Hæc promiscuè & indiscriminatim præscribere summæ esset ignorantix. Quid ergo hujus vel illius usum suadebit? Quinam sint pestiferi toxici effectus attende. Non idem in omnibus. Quidam valentibus omnino similes subito occumbunt. Alii sine febre sensibili bubones & anthracis passi evadunt. Ut plurimum tamen horrore corpiuntur, mox febre, febris comites plerumque sunt & assecræ jactationes & anxietates præcordiorum. Lingux siccitas adest, quandoque nigredo. Rubent oculi; visus turbatur; laborant aures tinnitu, sibilo, nonnunquam surditate. Sitis in quibusdam aspera, in aliis levis, aut nulla. Hos æstus vehemens urit, illos nullus calor molestat. Dolores capitis rarius acres pungunt, sæpius gravativi lecto affigunt. Vigilii, delirii, convulsivis subsultibus alii cruciantur; alii sopore gravi premuntur. In quibusdam pulsus est validus & naturali penè similis; in aliis parvus, creber, modo æqualis, inæqualis modo, quandoque intermittens. Sunt in quibus vires ab initio prostrantur. Sunt in quibus robustæ perseverant ad mortem usque. Urinam si inspexeris, modo naturalis apparet, modo rutilans & ignea, modo cruda & tenuis, aliquando etiam turbida. In eodem ægro nonnunquam hæ eadem die subit mutationes. Multi frequentes patiuntur alvi dejectiones, crudas, admodum fetentes, confusas, modo viridis, modo crocei coloris, interdum scatentes vermicibus, Haud infrequentius læditur ventriculus singultu, nausæa, vomitu bilioso, fetidissimo. Sudores in his pauci aut nulli, in illis copiosi, in nonnullis graveolentes, coloris (mirum dictu) varii, citrini, purpurei, viridis, nigri, & veluti sanguinolenti. Huic symptomatum illiadi non raro accedit narium, oris, oculorum, aurium, penis, uteri, (mali plerumque omnis) hæmorrhagia, Vultus alii pallidus, alii erysipelæ-

eus, plurimis sanorum colori non multum absimilis. In locis glandulosis tumores exoriuntur, bubones, parotides. In cæteris corporis partibus exilis modo pustula, sæpe plures simul junctæ sensim in molem assurgunt majorem modo, modo minorem. Hujus pars superior ex omnibus vesiculis in unam coeuntibus constata vulgo carbonem extinctum refert, quandoque vesiculam ichore nigricante plenam: pars subiecta quasi cæterio inusta colorem acquirit vel cinereum vel nigrum: tumoris ambitu obscuro rubore splendet: Latinis carbunculus, græcis *κάρπαξ* dicitur: res eadem, diversa nomina. Insuper maculis purpureis, nigris, violaceis, rubeis paucis modo, modo multis, angustis aut latis, ac ferè semper exactè rotundis pars aliqua corporis, vel totum corpus conspergitur. Hæc ferè sunt luctuosissimi morbi symptomata. Ex his variè ludentibus, ut hostis furentis intus vires, & vias, fraudesque solers deprehender Medicus, sic quibus auxiliis debellandus sit intelliget.

## I V.

**F**EBRIS adest? Hanc esse memento naturæ conamen; hujus nonnunquam salutare conatus, sæpe irriti. Salutares habeto si venenum per sudores eliminetur, vel in bubones aut *anthraxes* adigitur, utrumque cum ægri levamine. Hanc sinendam aut juvenandam edocent reliqui morbi, qui per cutaneas eruptiones judicantur. Variolæ, morbilli, petechiæ ritè procedunt? Sanguinem mittere, corpus vacuare, fovere, refrigerare nefas est; totum opus naturæ committendum benè consulenti. Eò sanctius præceptum quod in hoc morbo vel levissimum peccare, ægrum jugulare sit. Accedunt febri vel ipsam concomitantur jactationes anxietatis, dolores capitis lancinantes, vigilie, deliria, calor urens? Magnam venenati miasmatis partem ad præcordia, ad cerebrum expelli intelligito. Hinc pungi, convelli nervosum genus, vasa corrugari, sanguinis circuitum retardari. Tunc, præsertim si plethora sit, sanguinis missione è brachio, è pede opitulaberis. Procul absint cardiaca dicta, alexipharmaca, alia quæ naturæ tormenta. Sit victus parcius ex jussulis temperatis; potus tenuis & multus ex aquâ, aut prisanâ acidulatâ. Nitratis & camphoratis tumultuantes succos, irritata solida pacare studeas. Hac arte redintegrato fluidorum circuitu à venenato miasmate sese facilius expedit natura. Non eundem veneni effectum sopor indicat. Ex pulsu discernimen. Debilis est aut tardus? Narcotico imbuta toxico solida cogitabis. Horum cardiacis emetico mixtis motum excuscitare enititor; sed parce sanguini. Pulsus est fortis, durus & celer? Aut adest plethora, aut nimia sanguinis effervescencia, tum audacter sanguinem mittas. Non sint tibi fraudi diarrhæa, frequentisque alvi dejectiones, hæ non naturæ opus sed veneni intestina stimulantis. A quavis purgante caveto. Enematis, sed demulcentibus, si quid est faburræ detrahas, & confusas viribus. Diaphoreticis, prout febris finit, & absorbentibus virus debelles. Nausea & vomitus in primo morbi insultu vexant? Ventrículum pungit, commovet, subvertit aura venenata: si recens fuerit cum aëre, salivâ, alimentis vè hausta, emeticum propines. Seriùs adhibitum nocebit. Delapsum jam in intestinis chylum antequam vasa subierit per inferiora deturbare properabis: demum superstitis veneni sudoriferis eliminatio tentanda. At quæ vigente morbo cruciant, interclusi & à corporis periferiâ retrogradi sanguinis argumenta nauseas esse memineris. Hos morbi impetus æmulari facinorosum. Ni venam secueris, sanguis devius, cæterique liquores sua non relegend itinera: amicum non redintegrabitur solida inter & fluida commercium. Detractione sanguinis venenatam qualitatem imminui, detrahi, expelli quis neget nisi œconomiz animalis planè nescius? Enim verò nocentis toxicis eliminationem molitur natura: obices ponit ejus motibus succorum redundantium copia, aut in vasis minoribus tarditas, vel stagnatio: Hos ut circum agar acriùs feret: succi non obsecundantur? Vasorum diametros violant, apices aperiunt, erumpunt quâ datâ portâ; si per vias naturales, & debità quantitate, cum bonis ægri rebus; secus, cum vitæ dispendio, aut saltem summo discrimine. Maturè sanguinem detrahis? Sublatâ resistantiâ placide vasorum oscillationes peragentur, æquabili circuitu liquores in propriis circumferentur alveis, & morborum medicatrix natura venenatam auram aut per sudores abigit aut in colatoris deponet. Qualescumque igitur hæmorrhagias non per inde suspectas habueris. Copicissimo sæpe sanguinis è naribus fluxu morbus judicatur. Quæ suo tempore sunt catamenia finenda: si liberaliùs fluunt cum virium dejectione, venæ sectione, aut absorbentibus, aut utrisque cohibenda. Qui per alias vias erumpit sanguineus latex revocandus sistendus.

**I**NTER hujus pessimi morbi symptomata referri solent bubones, parotides, carbunculi seu anthraces, petechiæ; excretiones veriùs criticæ, Bubonibus sæpè, rariùs carbunculis, rarissimè petechiis morbus judicatur. Ejus rei rationem si quæras, accipe, Quicquid à centro corporis ad ambitum movetur, continetur arteriis. Hæ instar coni efformatæ crassiores particulas versus apicem propellunt, Quæ enim hinc, inde hiant in arteriis venularum orificia, arctiora sunt arteriæ diametro. Motui aptiores sanguinis arterioli particulæ venularum ora subeunt, densiores versus acumen urgentur. Huc appulsæ veneno turgidæ, si glandulas nanciscuntur, lymphatici liquoris affusione, quo madent harum extremitates spongiolæ, non nihil mitescunt, & ad supurationem disponuntur. Dein bubonis apertione datâ viâ ichor virulentus effluit. Novo sanguine easdem arterias subeunte, per sentinam expurgatur quicquid inest miasmate lethifero vitiatum. Pars interea sanguinis, cordi redditur, veneni purior. Sic sensim iteratis circuitibus sanguinis massâ defœcatur, purgatur. Si autem apices arteriarum in quibus volvitur sanguis impurus in musculosas aut membranosas partes definunt; hujus caustica virtus nihil demulsa in pus abit difficiliùs, sed partes quibus insidet adurit, & vicinas sepando depascit. Deinde obductâ partibus exesis crustâ duriori, perspirationis viâ occluduntur. Per carbunculum virulentæ materiæ minus protruditur quàm per bubonem; donec ulcere factò eidem paretur exitus. In plures simul arteriarum ramulos sæpè magna perniciosi miasmatis copia dispergitur. Tunc omnes ferè in his contenti sanguinis dislociatæ molecule lentescunt, hærent, maculis varii coloris conspicuæ. His extrudendis si par est natura, vincit, impar vincitur, laboranti naturæ ad laborare fatigis? Duriore sanguinis dilue particulas ejusmodi videlicet potulentis quæ solidorum oscillationes fovere naturales, debiliores augere, fortiores lenire queant. Bubones & anthraces manu curandi ex medici præscripto. Imperfectam crism arguunt aut permanentia aut non valde remittentia post quamlibet eruptionem symptomata. Tunc aliàs mitiùs tractandi bubones mox scapello aut cauterio aperiendi, vel vesicatoriis proliciendi, Carbunculi vero progressus inhibendus: substantia emortua quàm citissimè fieri potest separanda. In utroque tumoris genere factum ulcus tam diu apertum fervetur, quandiu venenatâ luis aliquid in corpore delitescere constabit. Huc omnis aliorum quæ supersunt symptomatum cura dirigatur. Imprimis caveto ne venæ sectione perperam celebratâ, aut catharticis ociùs adhibitis intus revoces quod in extremis resedit. Sic symptomatis indicantur quæ sint nocitura, quæ profutura sint, quibusque auxiliis vincere natura possit.

*Ergo Pests curatio Præsertim ex symptomatis.*

### DOMINI DOCTORES DISPUTATURI.

*M. Joannes-Jacobus Belleste.*

*M. Antonius Ferrein, è Regiâ Scientiarum Academiâ, Professor Regius & Chirurgiæ Professor,*

*M. Michaël Procopé Couteaux à Chirurgiæ Gallicæ Idiomate Professor designatus.*

*M. Michael-Philippus Bouwart, è Regiâ Scientiarum Academiâ.*

*M. Bartholomæus Murj,*

*M. Joannes - Cladius - Adrianus Helvetius, Regi à Sanctoribus Consultis, Regiæque Medicis Primarius, & Regiæ Scientiarum Academiæ socius.*

*M. Michaël-Josephus Majault.*

*M. Carolus Payen;*

*M. Jacobus - Benignus Winslow, Regiæ Scientiarum Academiæ Societatisque Regiæ Berolinensis socius, Teutonice Lingue Regius interpret, Censor Regius, in horio Regiæ Anatomies & Chirurgiæ Professor ac Demonstrator.*

Proponebat Parisiis, LUDOVICUS PATHIOT, Tricassinus, Saluberrimæ Facultatis Medicinæ Parisiensis Baccalarius, A. R. S. H. 1744.  
à sextâ ad meridiem.

Typis QVILLAU, Universitatis & Facultatis Medicis Typographi, 1744.